



DEMOKRAATIT  
DEMOKRATERNE

UPA/FM 2017/63

Randi Vestergaard Evaldsen

**Qitornavut pitsaasumik inuiaqatigiinni innuttaaqataalernissaasa pingaaruteqarnerat pillugu perorsaalernissarput qanoq oqallisiginerulersinnaaneripput pillugu apeqquteqaat allaavigalugu oqallinnissamik siunnersuut.**

(Inatsisartunut ilaasortaq Nivi Olsen, Demokraatit)

Demokraatiniit Ataaasummillu takusinnaavarput Isumaginninnermut, Ilaqutariinnermut, Naligiisitaanermut Inatsisinillu Atuutsitsinermut Naalakkersuisoq akissuteqaatimini ersarilluinnartumik allattoq, pitsaasumik perorsaaneq anguneqassappat innuttaasut aningaasaqarnikkut assigiinnerusumik tunngaveqartariaqartut. Demokraatit Atassullu tassunga atatillugu apeqqutigerusuppaat, Inatsisartut Ataatsimiittarfissaanik minnerpaamik 300 millioner koruunit sinnerlugit akeqartussamik sananissaq qanoq ililluni innuttaasunut aningaasaqarnikkut assigiinnerusumik tunngaveqarlersitsisinnaanersoq? Apeqqut siusinnerusukkut apeqqutiginikuuarput Naalakkersuisulli ulloq manna tikillugu akissutissaqartinnigilaat. Naalakkersuisut iluamik perorsarsimanningerat tamani oqaatigaarput qungujulasunnguamik.

Uagut politikerit akisussaanerpaavugut inimi maani kusanartumik oqallinnissaq pilersissallugu, ataqqinninnissaq akisussaassuseqarnissarlu siuttuuffigisussaavarput. Allanut naleqqiulluta pisussaanerpaavugut inuiaqatigiinnut pissuserissaarnermik ileqqorissaarnermillu aqcutissiuuissalluta. Tamatigut taamaattarpugut? Naatsumik oqaatigalugu naamik! Nipi oqaatsillu maani atorneqartartut ilaatigut uanga nammineq meerartatsinnut inuusuttatsinnullu apuukkusunngittaqaakka. Arlalitsigut taamaattariaqanngikkaluarluta pissusiluttaqaagut taamaattumillu ilaatigut maligassiuinngilluinnartutut pissuseqartarpugut. Tamatta akisussaaffigaarput kusanartumik oqalussalluta oqaloqatigiissallutalu, qalipaat, inuiaassuseq, upperisaq, sumiuussuseq, oqaatsit allallu apeqqutaatinnagit. Tamatigut taamaaliortapugut? Naamik, inimi maani atukkajunneqarput ingutsinerit, oqaatsit ataasiakkaat oqaaseqarnerillu nikanarsaasut, saassussinerit, oqaatsit atukkat pillugit nikanarsaanerit aammalu kinaassutsimik nikanarsaanerit. Tamakkuupput inuusuttunut ingerlateqqittakkagut, ataqqineqaatigilissanerpagut? Naamerluinnaq. Angisuumik akisussaaffeqarpgut takutissallugu immitsinnut ataqqilluta aammalu kusanartumik peqatigiissalluta, akisussaaffigaarput takutissallugu sutigut tamatigut ataqqeqatigiinnissap pingaassusaa.

Soorlu Demokraatit Inatsisartunut ilaasortaata Nivi Olsenip siunnersuumminut tunngavilersuummini oqaatigigaa, amerlaqaat tunngaviusumik perorsarneqarneq ajortut. Maani inimi siusinnerusukkut oqaatigereerpara, naatsumik oqaatigalugu pingasunik perorsaariaaseqartoq.



DEMOKRAATIT  
DEMOKRATERNE

Angajoqqaat naalagaaniartut nakkutilliisarput qitornamilu pisariaqartitaat takkuitsoorarpaat. Malittarisassiortarput oqallisiginagu nassuiarnagulu sooq malittarisassiortoqarnersoq.

Angajoqqaat akerlileruminaatsut annertuunillu piumasqaartarput, peqataanilli kialaartuupput qitornatillu oqaloqatigisarlugit. Angajoqqaat nassuiartarpaat sooq malittarisassiorterlutik aammali peqataanik ammaffigisarpaat malittarisassat pillugit qitornamik isumaasa tusarnaarnissaat.

Angajoqqaat qitornaminnut naalaannartut qitornaminnut kialaartuupput, killiliinerli ajorlutik.

Suna pitsaanerua? Qanoq ilinerani perorsaariaaseq suna pitsaanerua? Qanoq ilillunga ilisimassavara, angerlarsimaffinni ilikkarsimangikkukku?

Misissuinerup ersersippaa, angajoqqaat naalagaaniartut perorsaanerminni iluatsitsinerpaasartut. Meeqqat angajoqqaatik oqartussaasutut isigingippatigit, angajoqqaatik tatigippatigit aamma angajoqqaamik oqaasii malissallugit pisussaaffeqartutut isumaqarunik. Tamanna piginnaaneruvoq pingaarutilik aamma sakkuuvoq pingaarutilik, tamakku pillugit nunami maani angajoqqaat tamarmik ilinniartinneqarnissaat pingaarluinnartuuvoq.

Amerlavallaartut tamanna ajoraluartumik ilisimangilaat, amerlavallaat ilisimangilaat qanoq perorsaalluortoqarsinnaasoq - assersuutit amerlavallaartut takunikuuagut, amigaatigaarpullu tunngaviusumik paasinissaa, inuiaqatigiinni qanoq pissusilersortussaanerluta. Aap, peqqinnartuuvoq assigiinnngitsuunissarput, soorunami, kisianni qanoq iliortarpugut, qitornagut perorsarsinnaanngikkaagatsigit, qanoq ilillutik "innuttanngorsinnaasut pitsaasut"? Kiap akilertarpaa? Meeqqanut tuttarpoq.

Angajoqqaat akisussaaffigaat qitornatik perorsassallugit. Meeqqat atuarfiata politikerillu tamatuma saniatigit akisussaaffigaat maligassiuissallutik. Kisianni taakkuinnaanngilagut!

Angajoqqaat maligassiuissusaapput. Inuutissarsiortut aamma maligassiuissusaapput. Tamatta meerartatsinnut inuusuttatsinnullu maligassiuissusaavugut aamma inuusuttut inersimasut tarrarsorfigisussaavaat piomagutta piumanngikkaluaruttaluunniit. Immitsinnut ataqqilluta pissusilersorsinnaasariaqarpugut, isumaqatigiinnngikkaluaruttaluunniit. Tamatta tamanna ilikkartariaqarparput.

Amerlaqisut nukatsitaarujuusuarnerartarpaannga. Aap ilaana, angajoqqaakka isumaqataassajunnarsipput imalli oqaasertalerlugu nukattitaasunga asanninnermik, piumasqaatinik, kinguneqartitsisarnernik qanilaarnermillu imalimmik. Ilissi, maani issiasusi nalunngilarsi kikkulluunniit oqaloqatigisinnaagikka ataqqillugit. Nalunngilarsi kikkut tamaasa qungujulaartarikka, politikikkut isumaqatiginngikkaluarussiluunniit. Tassa taamaappunga, angajoqqaamma perorsarsimammanna, kimulluunniit, inuttut qanoq ittuugaluarpalluunniit



DEMOKRAATIT  
DEMOKRATERNE

kiinnerluartarnissannut, taamatut taamaasillutillu ilusilersueqataallutik qanoq ittuunissannut.

Uanga isumaga naapertorlugu perorsaaneq tassaangilaq, angajoqqaat pisuujunersoq, piitsuunersut imaluunniit taakku akornanni arlaanni inissisimanersut. Inuit kikkulluunniit angajoqqaajulluarsinnaapput. Taamaattumik Demokraatiniit Atassumillu Naalackersuisut isumaqatiginngilagut oqarmata perorsaalluarnissamut apeqqutaasoq inuiaqatigiinni aningaasaqarnikkut assigiinnerusumik atugaqarnissaq tunngaviussasoq. Perorsaalluarnermut pissuserissaarnermullu aningaasaateqarluarneq aningaasaateqannginnerluunniit apeqqutaanngillat.

Taamaakkaluartorli suli soqutigaara Isumaginninnermut, Ilaqutariinnut, Naligiissitaanermut Inatsisinullu Atuutsitsinnermut Naalackersuisumit tusassallugu Inatsisartut Ataatsimiittarfissaanik sananissaq qanoq ililluni innuttaasunut aningaasaqarnikkut assigiinnerusumik tunngaveqarlersitsisinaanersoq taamaasillunilu meeqqat inuusuttullu perorsarneqarnissaannut innuttaaqataasunngortillugit pitsaasut.

Qilanaarpunga pitsaasumik kusanartumillu oqallittoqarnissaanut immitsinnut ataqqilluta.